

Editorial

Kawalan ng lupa ang problema

Rebolusyong Agraryo ang sagot ng masa

“Kung walang hukbong bayan, wala kahit ano ang mamamayan.”

Ito ang aral na muling tumitimo sa masang magsasaka sa Gitnang Luzon habang nagtatamo ng mga bagong tagumpay sa pagsusulong ng rebolusyong agraryo. Tanda ng ganitong pagkilala ang nararamdamang sigla sa pagsampa sa NPA ng pinakamahuhusay na anak ng mga pamilyang magsasaka sa kanayunan ng rehiyon.

Ang muling pagsigla ng rebolusyong agraryo ay bunga ng pagkakatalaga ng Partido sa pinakamalaking bahagi ng hukbong bayan sa gawaing masa mula nang isulong ang Ikalawang Dakilang Kilusang Pagwawasto. Muling lumalim ang kaalaman ng hukbo sa mga suliranin ng masa. Katuwang ang hukbo, inilaban ng masa ang kanilang mga karaingan laban sa mga panginoong maylupa.

Makabuluhan na ang pakinabang na natamo ng masang magsasaka sa nagawang pagpapababa ng buwis sa lupa, pagpapababa ng interes sa pautang, pagpapababa ng upang makinarya at pagpapataas ng sahod ng mga manggagawang bukid. Sa ilang lugar ay naigigiit na ng mga manggagawang bukid at maralitang magsasaka ang karapatang magbungkal ng lupa lalo na sa mga lupaing

Nilalaman

Editorial	1-2
Rebolusyong Agraryo sa GL	3-6
NDF: Pag-iisa sa Diwa at Kapasyahan ng Mamamayan	7-10
NDF, nakaugat sa masa	9
Balita: Masaker sa Dingalan	10
VFA: Lisensya ng US . .	11-12

Editoryal, mula sa pahina 1

tiwangwang. May mga posisyon na ang dating walang saka.

Sa panahon ng pag-iral ng linyang “estrategikong kontra-opensiba” o SCO noong dekadang 1980, kasabay ng adbenturismong militar — ng tuluy-tuloy na pagpapaigting ng digma kahit napakahina pa ng rebolusyonaryong pwersa kumpara sa kaaway — ang iba’t ibang paglihis sa pagsusulong ng rebolusyong agraryo. Kabilang dito ang hindi napapanahong kumpiskasyon ng lupa at libreng pamamahagi na nito, ang kasunod nitong pagiging palaasa sa mga pondo ng mga dayuhang ahensya at *non-governmental organization* para may ipantustos sa produksyon at sumunod na pagkalulong sa ekonomismo, at ang mga putsistang aksyon gaya ng panununog sa mga bodega at kagamitan ng mga panginoong maylupa.

Nariyan din ang tinawag na RA-legal na sa ilang kaso ay nangahulugan ng labis na pag-asa sa mga korte sa pagresolba ng mga usaping agraryo hanggang sa tuluyang malulong sa ligalismo.

Marami pang tagumpay at pakinabang sa Rebolusyong Agraryo ang matatamo habang paparaming masa ang naoorganisa sa mas maraming bayan at baryo, at habang patuloy na lumalakas ang hukbong bayan.

Noong mga taong 1990 hanggang 1992, tuluyan nang hindi naharap ang pagsusulong ng rebolusyong agraryo nang ang mga rebolusyonaryong pwersa sa rehiyon ay maghanap ng *short-cut* sa tagumpay sa pamamagitan ng pagtutulak sa tahasang

linyang insureksyonismo at pag-abandona sa landas ng matagalang digmang bayan. Sa kabuuang paghina ng rebolusyonaryong pwersa lalo na ng hukbong bayan, nagawang bawiin ng mga panginoong maylupa maging ang mga naunang tagumpay at pakinabang na bunga ng pakikibaka.

Ngayon ay kasama ng Partido at ng hukbong bayan ang masa sa pagtatakwil sa linyang SCO at sa iba pang linyang nagbunga ng mga paglihis sa pagsusulong ng rebolusyong agraryo noong nakaraan. Mas marami pang tagumpay at pakinabang sa RA ang matatamo sa susunod na mga taon habang paparaming masa ang naoorganisa sa mas maraming bayan at baryo at habang patuloy na lumalakas ang hukbong bayan.

Sa paglutas ng kanilang suliranin sa lupa, nalalantad ang kahungkagan ng reporma sa lupa ng papet na gubyernong Estrada at ibayong tumitibay ang kapasyahan at sariling lakas ng masang magsasaka sa pagsusulong ng rebolusyong agraryo sa balangkas ng bagong demokratikong rebolusyon.●



Grapik mula sa ULOS

Sa tanglaw ng Kilusang Pagwawasto

Rebolusyong Agraryo, muling sumisigla sa Gitnang Luzon

Si Ka Insiong ay isang maralitang magsasaka sa baryo Benedicta. Kapos para sa kabuhayan ng kanyang pamilya ang kalahating ektaryang kanyang sinasaka, kaya't kailangan niyang makitanim at makigapas bilang manggagawang bukid.


Tulad ng mga magsasaka sa Pilipinas, patuloy na lumalala ang bangkaroteng kabuhayan ni Ka Insiong. Ngunit sumisilay pa rin ang pag-asa.

Si Ka Insiong ay kasapi ng Pambansang Katipunan ng Magsasaka (PKM). Kamakailan, ang dating P60 na upang tanim kay Ka Insiong ay itinaas sa P70. Kasabay nito, bumaba ng P200 ang gastos niya sa paghahanda ng bukid dahil sa pagbaba ng upang handtractor. Kasama ang mga kababaryo, pinaunlad ni Ka Insiong ang mga gulayan, patubig at palaisdaan sa kanilang lugar.

Ayon kay Ka Biko, kasapi ng yunit ng BHB na sumasaklaw sa baryo Benedicta, ang kuwento ni Ka Insiong ay isa lamang sa libong magsasakang nakikinabang sa inilulunsad na minimum na programa ng Rebolusyong Agraryo (RA) sa mga sonang gerilya sa Gitnang Luzon.

Partikular sa anim na baryong saklaw nina Ka Biko, ang minimum na programa ng RA na ipinatupad ay: pagpapataas ng upang manggagawang bukid sa tanim, bunot-punla, tabas at araro, pagpapababa ng upang makinarya (hand tractor at rotobator o traktora). Bahagi rin ng RA ang pagpapaunlad ng produksyon tulad ng kampanya sa pagtatanim ng gulay at pag-aayos sa mga tabon at palaisdaan. Mahigit 2,000 pamilyang magsasaka ang nakikinabang ngayon sa matagumpay na paglulunsad ng RA.

Ang RA bilang integral na bahagi ng armadong pakikibaka ay pagpapatupad sa rebolusyonaryong solusyon sa pyudal at



malapyudal na pagsasamantala ng uring panginoong maylupa. Ipinatutupad ito ng PKM at iba pang organisasyong masa sa kanayunan, kasama ang BHB, upang uk-ukin hanggang sa tuluyang maibagsak ang kapangyarihang pang-ekonomya at pampulitika ng uring panginoong maylupa. Sa pamamagitan ng pagsusulong ng RA ay nabubuo ang pagkakaisa ng uring magsasaka laban sa uring panginoong maylupa. Lalong lumalakas ang paglahok at pagsuporta ng masang magsasaka sa armadong pakikibaka.

Muling pinasisigla ngayon ang RA sa rehiyon, sa tanglaw ng Ikalawang Dakilang Kilusang Pagwawasto pagkaraan ng mahigit isang dekadang kahinaan at pagkamamali sa pagsusulong ng RA. Bunga nito, muling napalapit at napamahal ang BHB sa masa. 'Ika nga ng isang may edad nang kasapi ng PKM: "Bumalik na ang dating Hukbo".

Pagkalahis ng landas ng RA

Mula maagang bahagi ng dekada '80 hanggang '90 ay lumaganap ang mga maling konsepto at praktika ng pagsusulong ng RA sa rehiyon dulot ng paglahis sa linya ng matagalang digmang bayan. Dahil dito'y humina at tumamlay ang mga organisasyong masa at ang malawakang pagsuporta't paglahok sa armadong pakikibaka ng masang magsasaka.

Sa pagpapaigting ng digma sa balangkas ng programang SCO, naglunsad ng mga putsistang aksyon gaya ng panununog ng mga bodega at kagamitan ng mga panginoong

Ang Rebolusyong Agraryo sa Barrio Benedicta at mga karatig

Kung Utang (3 buwan bago bayad)	4 kaban ng palay	3 1/2 kaban ng palay	1/2 kaban

Rebolusyong Agraryo, mula sa pahina 3

maylupa. Ipinalaganap at ipinatupad ang konsepto ng paghahalu-halo ng ligal, ilegal at semi-ligal na mga paraan ng pagkilos ayon sa maling panawagan ng KR noong 1986 ng “integrated” na paraan ng pagsusulong ng RA, na diumano ay paggamit ng mga ligal, ekstra-ligal at semi-ligal na paraan at nilalahukan ng iba’t ibang sektor sa lunsod at kanayunan; at ginagamitan ng mas mapamwersang hakbang.

Sa ilang probinsya na may inabot na antas ng pamamahagi ng lupa, lubhang umasa sa mga pondong galing sa labas tulad sa NGOs at hindi na nagpursiging umasa sa sariling lakas ng mga organisasyong masa. Lumakas ang ekonomismo lalupa’t hindi nagtuloy-tuloy ang pagmumulat ng masa at humina rin ang kapasyahan ng masa para puspusang isulong armadong rebolusyon.

Sa maraming lugar naman, dahil sa kasagsagan ng pagpapaigting, simpleng napabayaang ang gawaing masa at ang pagpapatupad ng RA.

Noong 1991-1993, alinsunod sa tahasang linyang insureksyonista, umiral naman ang maling konsepto ng RA-legal sa ilang bahagi ng rehiyon.

Ang nilaman ng programa sa RA ay okupasyon at pamamahagi na humantong sa mga labanan sa korte at iba pang ahensya ng gubyerno nang bweltahan ng mga panginoong maylupa ang masang magsasaka.

Pero ang pinakamasahol na inabot ng disoryentasyon sa pakikibakang masa ng magsasaka ay ang konsepto ng mga pag-aalsang magsasaka bilang bahagi ng pangkalahatang opensiba sa paghahangad ng madaliang tagumpay. Ikinasa ang mga “pag-aalsang magsasaka” noong 1990, sa kalagayang lubha nang humina at lumiit ang baseng masa, malalaki na ang pinsala sa Partido at Hukbo dahil sa pananalasa ng linyang SCO noong huling bahagi ng dekada ’80. Itinayo ang mga ligal na organisasyong masa ng magsasaka imbes na itayo ang mga ilegal na organisasyon nila. Sa pag-asa sa ispontanyong masa para pumutok ang mga pag-aalsa, sinagasaan na ang pagbubuo ng solidong lakas sa hanay ng masang magsasaka.

Sa halip na unti-unting pag-iipon ng lakas sa kanayunan, nilustay ang naipundar na mga organisasyong masa ng magsasaka, inuk-ok ang prinsipyo ng pag-asa-sa-sarili at itinaguyod ang ekonomismo, isinubo ang masa sa mga gasgasan at di-napapanahong labanan at

napabayaang ang pagpapalakas ng Partido at Hukbo.

Pagsusulong ng RA at paglakas ng armadong pakikibaka

Ayon kay Ka Biko, 1996 nang pasimulan ang gawaing rekoberi sa lugar nina Ka Insiong. Kahit matagal nang nakikilusan at may nauna nang karanasan ng RA, bumagsak ang organisasyong masa sa mga baryo dahil sa mga naging pagkakamali ng kilusan. Pero makaraan ang isang taon, ayon kay Ka Biko, unti-unting naibalik sa tamang landas ng matagalang digmang bayan ang gawain sa kanayunan.

Muling naitindig ang mga balangay ng PKM sa magsasaka, kababaihan at kabataan, gayundin ang sentro ng Partido sa baryo. Sumulong ang mga edukasyong masa at umaabot sa 60% hanggang 80% ang nakatagpos ng mga batayang pag-aaral sa mga baryo.

Naglunsad din ng panlipunang pagsisiyasat at pagsusuri sa uri. "Kinumpleto namin ang pagsisiyasat," wika ni Ka Biko. "Malaking porsyento ang maralitang magsasaka sa mga baryo...hindi pantay at mababa ang antas ng upa sa manggagawang bukid, at dahil kulang ang kabuhayan, makayari ang trabaho sa baryo, dumarayo sila sa ibang baryo...ngayong taon, maraming hindi nakapagsaka dahil sa walang tubig," salaysay ni Ka Biko sa mga problema sa baryo.

Isang solusyon ang pagbubungkal at pagtatanim ng gulay sa di-produktibong lupa sa baryo upang pandagdag-kabuhayan at pagpapaunlad sa kooperasyon sa paggawa. Ang mga binhing ipinunla ay nagmula sa mga pwersa ng PKM sa karatig-munisipalidad. Kasama na rin sa RA ang kampanya sa pagtitipon ng buto ng mga gulay at puno.

Bagamat masasabing napakababa pa rin ng sahod ng manggagawang bukid, malaking tagumpay na maituturing ang minimum na programa ng RA dahil sa nabubuong pagkakaisa ng mga magsasaka. Sa paglulunsad ng pakikibaka, tinitiyak ng mga kasama na mareresolba ang kontradiksyon sa pagitan ng mga masa.

Halimbawa ang pagpapababa ng upang traktora (rotobator). Mga mataas na panggitna at mayamang magsasaka ang karaniwang may-ari ng mga ito, at umuupa sila ng manggagawang bukid na siyang opereytor. Sa pakikipagharap ng PKM at BHB sa mga nagpapaupa ng makinarya, lumabas sa kwenta na kumikita ang may-ari ng makinarya ng P400 netong kita sa bawat ektarya. Nakwenta ng PKM na may matitira pa ring kita ang may-ari na P200 kahit ibaba ang mga upang makinarya, at mintinado ang upa sa opereytor. Pumayag ang mga mayaman at panggitnang magsasaka sa patakarang ito.

Ang mga nakikinabang sa RA ay maluwag-sa-loob na nagbibigay ng rebolusyonaryong buwis sa rebolusyong agraryo (RB-RA), bilang kanilang suportang materyal sa armadong pakikibaka. Ayon kay Ka Biko, maraming boluntaryong nagbibigay ng higit pa sa itinakdang RB-RA.

Ayon kay Ka Biko, may "ligwak" ang epekto ng RA sa mga kalapit baryo: "Lumalapit sa atin ang mga masa at hinahatak tayong magpatupad ng RA sa baryo nila... Kahit nga ang mga nasa barangay council, sa atin dinadala ang mga problemang inilalapit sa kanila ng masa."

Hindi na mabubura sa kasaysayan ng Benedicta at iba pang mga baryong saklaw ng sonang gerilya ang mga nakamit na tagumpay sa mga nakaraang RA. Lahat ng maralita at panggitnang magsasaka sa mga baryong ito ay

Napakahalagang tagumpay ng Rebolusyong Agraryo ang paparaming bilang ng mga kabataang magsasaka na sumasapi sa BHB bilang Pulang Mandirigma.

Mahalagang tagumpay ang pagtaas ng kamulatan at kapasyahan ng masang magsasaka para patuloy na isulong ang pakikibakang agraryo at paglahok sa armadong pakikibaka.

Rebolusyong Agraryo, mula sa pahina 5

hindi na nagsisipagbayad ng amortisasyon ng CLT sa gobyerno mula nang ikampanya ng PKM ang tigil-bayad noong maagang yugto ng dekada 70. Ang mga lupa ay dating bahagi ng asyenda. Ang panginoong maylupa ay tumakas dahil sa takot sa nabuong rebolusyonaryong kapangyarihan ng magsasaka, makaraan ang ilampung taong pagsasamantala sa pagod nila.

Naipagtagumpay na rin ang pamamahagi ng plantasyon na bahagi ng asyenda. Sa isa pang baryo, ang mga magsasaka, sa pamumuno ng PKM ang namamahala ng patubig matapos maipagtagumpay ang laban sa NIA na pilit silang sinisingil sa dinebelop ng mga kanal-irigasyon, isang serbisyong dapat libreng pakinabangan ng mga magsasaka.

Ayon kay Ka Fiero: "Sa pagsigla ng RA, mabilis na lumalawak at nakokonsolida ang mga

organisasyong masa ng magsasaka pati na rin ng kababaihan at kabataang magsasaka. Masisigla ang kanilang mga kampanya't pakikibaka hindi lamang kaugnay ng rebolusyong agraryo kundi pati sa kalusugan at sanitasyon, literasiya at iba pa."

"Napakahalagang tagumpay ang paparaming bilang ng mga kabataang magsasaka na sumasapi sa BHB bilang Pulang Mandirigma," dagdag niya.

"At siyempre," dagdag pa ni Ka Fiero, "mahalagang tagumpay din ang pagtaas ng kamulatan at kapasyahan ng masang magsasaka para patuloy na isulong ang pakikibakang agraryo at iba pang pakikibaka ng masang magsasaka, pagpapalawak at pagpapaunlad ng mga organisasyon nila at pagsuporta't paglahok sa armadong pakikibaka."

May ibayong kapasyahan ang masang magsasaka na makipagtulungan sa Partido at Hukbo na hakbang-hakbang itayo ang mga organo ng kapangyarihang pampolitika para maging realidad sa hinaharap ang demokratikong gubyernong bayan – ang gubyernong maituturing nilang tunay na kumakatawan at naglilingkod sa masang anakpawis. Isang gubyernong bahagi sila sa pagtatayo at pamamahala.

Sa gitna ng krisis, sumisibol ang pag-asa sa mga baryong tulad ng Benedicta. Maaliwalas ang landas ng demokratikong rebolusyong bayan, ang tunay na magreresolba sa kahirapan.●

Para sa mga Mambabasa



Malugod kaming nag-aanyaya sa lahat (lalo na sa mga nasa organisasyong masa) na magpadala ng inyong mga mungkahi, puna, o nabiting ideya tungkol sa mga nilaman ng ating **Himagsik**. Nais din naming humingi mula sa inyo ng mga balita, artikulo o malikhaing gawa (tula, kuwento, sanaysay, debuho) na naglalarawan ng buhay at gawain sa rebolusyon para sa ating pahayagan.

Para sa mga artikulo o balita, kailangang lamanin ang mga sumusunod: Sino, Ano, Kailan, Saan, Paano. Tiyaking mapapangalagaan ang seguridad ng mga tao at lugar sa inyong mga artikulo.

Pagyamanin natin ang Himagsik upang maging pantulong sa mga talakayang-papag at iba pang diskusyong pang-masa. Makipag-ugnayan sa nakatalaga sa gawaing propaganda-edukasyon ng inyong organisasyon para sa pagpapadala ng inyong mga mungkahi o artikulo.

Mula sa Patnugutan



NDF: Pag-iisa sa Diwa at Kapasyahan ng Mamamayan para sa Makatarungan at Pangmatagalang Kapayapaan

Patuloy ang NDF bilang organisadong hanay ng mga demokratikong uri at sektor sa lipunang Pilipino, sa pagpupursigi sa pagtamo ng makatarungan at pangmatagalang kapayapaan para sa mamamayan.

Mula nang itatag ang Komisyon sa Paghahanda nito noong 1973 at nabuo ang sampung-puntong programa nito, umani ito ng mga makabuluhang tagumpay sa pagbubuklod ng mamamayan sa batayan ng mga prinsipyo ng bagong tipong pambansa demokratikong rebolusyon. Bunga nito, patuloy na umaani ng prestihiyo at pagkilala ang NDF sa hanay ng mamamayang Pilipino, gayundin, sa mga mamamayan sa ibang dako ng daigdig.

Hindi naging balakid ang masikot at mahirap na daan tungo sa kapayapaan sa pagpupursigi ng NDF sa usapang pangkapayapaan. Habang mahigpit na tinatanganan ang prinsipyong ang armadong pakikibaka ang pangunahing anyo ng pakikibaka, masikhay at mapanlikha nitong isinusulong ang mga interes ng malawak na mamamayan sa iba't ibang larangan at paraan ng pakikibaka.

Isang larangang kapaki-pakinabang para sa NDF at sa mamamayan ang usapang pangkapayapaan pag mahigpit ang pagtangan sa mga aral sa negosasyong pangkapayapaan noong panahon ng rehimeng Aquino at maging ng mga nauna pa sa kasaysayan ng rebolusyong Pilipino.

Para sa mga tunay na naghahangad ng makatarungan at pangmatagalang kapayapaan, walang dudang ang NDF ay sinsero sa pagtamo ng kapayapaan. May kasunduan man o wala, ang NDF ay nagbibigay ng pinakamataas na pagpapahalaga sa pagkilala at paninindigan sa

isang tampok na usapin sa kapayapaan – ang karapatang pantao at ang internasyunal na makataong batas. Naninindigan ang NDF na ito ay isang batayang layunin sa demokratikong rebolusyon at esensyal sa rebolusyonaryong pag-iisa sa pinakamalawak na masa.

Sa katunayan, kusang nagsumite ang NDF sa Swiss Federal Council at sa ICRC ng Deklarasyon ng Pananagutan sa Geneva Convention 1949 at Protocol I ng 1977.

Ngayong taon, nagtamo ng malinaw, kongkreto at makabuluhang tagumpay ang NDF sa usapang pangkapayapaan. Pagkaraan ng limang taong pakikipagnegosasyon sa GRP, pinirmahan ng mga *negotiating panel* ng NDF at GRP ang Komprehensibong Kasunduan sa Paggalang sa Karapatang Pantao at Internasyunal na Makataong Batas noong Marso 16, 1998. Noong Abril 10, pinirmahan ni Mariano Orosa ang Kasunduan at pagkaraan ng ilang panahon ng pag-aatubili, pinirmahan ng GRP sa pamamagitan ng bagong presidente na si Estrada noong Agosto. Alinsunod sa mga tuntunin sa usapang pangkapayapaan, ang Kasunduan ay magkakabisa sa pagpirma ng mga *principal*.

Komprehensibong Kasunduan: Isang Makabuluhang Tagumpay ng NDF at Mamamayang Pilipino

Ang Kasunduan ay isang mabuluhan at importanteng panandang bato sa pakikibaka ng mamamayan laban sa pang-aapi at pagsasamantala.

Ayon na rin kay Mariano Orosa, sa Deklarasyon ng Aprubal: “Sa kabila ng mga limitasyon nito, ito ay isang dokumento na may malalim na kabuluhan at may pangmatagalang pakinabang sa mamamayang Pilipino dahil ito ay

NDF , mula sa pahina 7

makabuluhan sa kasalukuyang sitwasyon ng karapatang pantao at internasyunal na batas pantao at ito ay tumutugon sa pangangailangan at kahilingan ng mamamayan.”

Pwedeng gamitin ang Kasunduan ng rebolusyonaryong kilusan bilang dagdag na sandata at pansuhay sa malaganap na paglaban ng mamamayan at para sa puspusang pagsulong ng rebolusyong pakikibaka sa pamamagitan ng paglalantad at paglaban sa mga pasistang abuso at pagtatanggol sa makataong karapatan ng mamamayan.

Ang Kasunduan ay naglalagat ng mga ispisipikong alitunuin sa pagtrato sa mga kombatan, sibilyan at iba pa na kailangang tupdin ng mga sangkot sa armadong labanan. Pinagbabawal nito ang sapilitang pagpapalikas ng mga komunidad sa mga erya ng operasyon ng AFP at PNP. Pinagbabawal din nito ang pagpatay at di-makataong pagtrato sa mga kombatan na nabihag sa labanan.

Nilalatag din ng kasunduan ang mekanismo para sa pagsubaybay sa pagpapatupad ng Kasunduan. Pwedeng gamitin ito sa pagpoprotesta sa mga paglabag sa karapatang pantao at manawagan ng pagpaparusa sa mga lumabag dito.

Isang napakamakabuluhang tagumpay din ang probisyon sa bayad-pinsala sa mga biktima ng paglabag ng karapatang pantao noong panahon ng batas militar. Sa gayon, pormal nitong kinilala ang mga paglabag sa karapatang pantao ng diktadurang Marcos.

Inilalatag ng Kasunduan ang pundasyon para sa komprehensibong kasunduan hinggil sa repormang panlipunan at pang-ekonomiya, reporma sa pulitika at konstitusyon, at sa pagtatapos ng hostilidad at disposisyon ng mga

pwersa, alinsunod sa The Hague Joint Declaration ng Set. 1, 1992.

Makatarungan at Pangmatagalang Kapayapaan sa Pamamagitan ng Armadong Rebolusyon


Bagaman humaharap sa negosasyon ang NDF, wala itong ilusyon na ang imperyalismong US at mga lokal na reaksyonaryo ay kusang loob at buong-buong tutupad at magtataguyod ng paggalang sa karapatang pantao at internasyunal na makataong batas. Ang GRP ang tagapagtaguyod sa interes ng imperyalismo, PML at MBK.

Pwedeng gamitin ang Kasunduan bilang dagdag na sandata sa paglaban ng mamamayan sa pamamagitan ng paglaban sa pasistang abuso at pagtatanggol sa makataong karapatan ng mamamayan.

Tinangkang talikuran ng rehimeng Ramos ang pagpirma at pagpapatupad ng Kasunduan. Inaprubahan niya ang Kasunduan “sa prinsipyo”, subali’t may kakabit na pasubali na sa esensya ay magbabalewala sa mga nakamit ng pagsulong ng usapang pangkapayapaan. Nais ng reaksyonaryong rehimen na ang Kasunduan ay magkakabisa lamang pag naipatupad ang kahit isa sa mga sumusunod na rekisito: kung may mutwal na

deklarasyon ng tigil-putukan o pagtigil ng hostilidad sa buong panahon ng usapang pangkapayapaan, o pagkatapos na makumpleto ang tatlo pang kumprehensibong kasunduan. Kinalaunan, ipinasa ni Ramos ang pagpirma sa Kasunduan sa rehimeng Estrada, na wala namang saligang ipinagkaiba sa sinundan nitong rehimen sa tindig sa mga mayor na usapin.

Ang Kasunduan sa realidad ay magiging mabisa lamang hanggang kung saan maigigiit ng mamamayan ang pagpapatupad nito. Sa kabila ng pag-sang-ayon ng GRP sa Kasunduan, nagpapatuloy ang kontra-rebolusyonaryong dahas.



Patuloy na nakaugat sa masa

Si Kasamang Luis Jalandoni, ang Punong Negosyador ng NDFP sa usapang pangkapayapaan sa pagitan ng NDF at GRP, kasama si Coni Ledesma, myembro ng Lupon sa Negosasyon, sa ginanap na dayalog/konsultasyon sa pagitan ng NDF at mamamayan ng Gitnang Luzon noong Mayo 18, 1998.

Sa katunayan, sa Gitnang Luzon, walang patid ang mga strike at intelligence operations ng AFP at PNP sa Aurora, Nueva Ecija, Bulacan, Bataan at Zambales, kahit pa sa panahong nagdeklara ng SOMO ang rehimeng Ramos. Dagdag pa pinakatan na rin ng malalaking pwersa ang Pampanga at Tarlac at nagsasagawa ng mga operasyon sa mga hinihinalang base ng BHB.

Ito ang nagsasabi sa atin kung bakit kailangang laging igiit ang makataong karapatan at pagmatyagan ang paglabag dito.

Ang ligalig at kawalan ng kasarinlan ng mamamayan ay hindi lamang sa paglabag sa mga demokratikong karapatan nila kundi sa mas masaklaw pang karapatan nila bilang mamamayan – laluna sa kasarinlan at kabuhayan. Sa Gitnang Luzon, tulad ng iba pang

Ang naturang konsultasyon/dayalog ay bahagi ng mga pagsisikap ng NDFP bilang pagkilala sa papel ng mga mamamayan bilang bahagi at kalahok sa usapang pangkapayapaan. Layunin ng konsultasyon na mailinaw ang layuning ng usapang pangkapayapaan at ang mga naging pagsulong kaugnay nito; maiharap sa NDF ang mga suliranin at usapin ng mamamayan ng Gitnang Luzon para maikonsidera ng NDF sa adyenda sa sosyo-ekonomikong reporma na ihaharap sa GRP sa pagpapatuloy ng Usapan; ipaabot ang komitment ng NDF sa pakikibaka ng mamamayan; at pagkaisahin ang mga mamamayan na dapat harapin at tugunan ang mga ugat ng suliranin ng mamamayan para makamit ang tunay na katarungan at pangmatagalang kapayapaan.

Tinanggap ng NDF ang mga ihinapag na mga usapin at isyu ng mamamayan ng Gitnang Luzon – mula sa magsasaka, manggawa, guro, kabataan-istudyante, kababaihan at mga biktima ng kalamidad. Bilang tugon, idineklara ni Luis Jalandoni ang komitment ng NDF sa mga usapin at pakikibaka ng mamamayan ng rehiyon.

bahagi ng bansa, kakabit ng suliranin sa militarisasyon at paglabag sa karapatang pantao ang mas masasaklaw at malalalim na suliranin - kasalatan o kawalan ng lupa, kawalan ng suporta sa kabuhayan at kawalan ng serbisyo, kawalan ng trabaho – sa ilalim ng malakolonyal at malapyudal na lipunan.

Nagpapatuloy ang armadong rebolusyon sa harap ng lumalalang krisis panlipunan. Lumalawak ang paglaban ng mamamayan sa pang-aapi at pagsasamantala ng dayuhang kapitalista at mga lokal na naghaharing uri. Lumalawak ang bilang ng mamamayan na tumatahak sa armadong rebolusyon para sa saligang pagbabago.

Sundan sa **NDF**, pahina 10



Larawan
mula sa
Liberation

NDF, mula sa pahina 9

Sa pamumuno ng Partido Komunista, patuloy ang NDF sa pag-abot sa pinakamalawak na mamamayan – uri at sektor – para sa paglahok sa armadong rebolusyon. Pinapatibay nito ang diwa at kapasyahan ng mamamayan para ipaglaban ang pambansang pagpapalaya, makamit ang tunay na demokrasya at ibayong isulong ito sa sosyalistang rebolusyon at konstruksyon. Sa ganito lamang makakamit ang makatarungan at pangmatagalang kapayapaan.

Sa Gitnang Luzon, tulad sa ibang bahagi ng bansa, kakabit ng suliranin sa militarisasyon at paglabag sa karapatang pantao ang mas malalalim na suliranin sa kawalan ng lupa, suporta, trabaho, kabuhayan, serbisyo -- sa malakolonyal at malapyudal na lipunan.

Sa pagsulong at pagkamit ng mga tagumpay sa armadong rebolusyon, nagkakaroon ng mas higit na kakayahan ang NDF at mamamayan na igiit ang paggalang sa karapatang pantao at internasyunal na makataong batas. Gayundin, magkakaroon ng higit na kabuluhan ang Kasunduan sa pagsulong ng armadong rebolusyon at pagtindi ng armadong labanan. ●

Balita

Masaker sa Dingalan, binyag sa dugo ng Rehimeng Estrada

Sa kabila ng seremonyal na paglagda ng Rehimeng Estrada sa Komprehensibong Kasunduan sa Paggalang sa Karapatang Pantao at Pandaigdigang Makataong Batas ay walang tunay na indikasyon na gumagalang ito sa karapatang pantao.

Wala ni imbestigasyon o kahit pahayag man lang ng pagkabigla sa asal-hayop na masaker ng mga sundalo ang narinig mula sa Rehimeng Estrada. Mahigit apat na buwan na nang maganap ang pagmasaker sa apat na kabataan at pagbihag sa isa pa ng mga elemento ng 56th at 70th IB ng Philippine Army sa barangay Dikapanikian, Dingalan, Aurora noong Hunyo 9. Ang mga bangkay ng dalawa sa mga pinaslang ay hinalay at saka tinadtad ng bala mula sa balakang pababa.

Ang mga pinaslang ay sina: Marites Casamis, edad 16, Cely Anonuevo, 14, na hinalay ang mga bangkay; Ricardo Ilustre, 19; at Jimmy Baltazar, 18. Ang nabihag na si Wilfredo Quibral ay tinortyur at iligal na ikinulong ng 37 araw.

Ang mga pinaslang ay mga di-armado, nahuli nang buhay at saka binaril nang malapitan, ayon sa ulat ng ginanap na independent fact-finding mission ng grupong KARAPATAN. Sinunog pa ng mga sundalo ang mga damit ng dalawang dalagita upang “burahin” ang ebidensya ng kanilang kahayupan.

Kabilang na ang dalawang menor-de-edad, ang mga biktima ay nagmula sa maralitang magsasaka na kabilang sa grupong pantulong ng Bagong Hukbong Bayan para sa gawaing di-kombatant, bahagi sa lahatang panig na pagsusulong ng rebolusyonaryong gawain sa kanayunan. ●

VFA, mula sa pahina 12

Luson, sa ilalim ng VFA, sa buong 7,100 pulong saklaw ng Pilipinas maaaring maglabas-masok ang mga sundalong Amerikano – na exempted sa liabilidad at di saklaw ng batas.

Nitong nakaraang Agosto-Setyembre, naglunsad sa rehiyon ng mga magkasanib na pagsasanay ng tropang Pilipino at Amerikano, ang huli ay mintinado sa hindi lalampas ng 20 hanggat hindi aprubado ang VFA: ang ehersisyong nabal sa Bataan, at “sibiko-militar” (pagbabakuna, pagkatapos ay *jungle survival*) sa Nueva Ecija.

Ang sinasabi ni Embahador Hubbard na “mapagkaibigang pagbisita” ay bahagi ng ginagawang pasulong na deployment ng mga tropa ng US sa iba’t ibang bansa. Hindi upang maging mapagkawanggawang “Pulis ng Daigdig” kundi bahagi sa “pagiging handa” nito – sa digma. Digmaan ang kasukdulang tutunguhan kapag umigting ang gawan ng mga imperyalistang bansa na makapangibabaw sa ekonomya, pulitika at teritoryo, at palagi itong pinaghahandaan ng Imperyalistang US.

Kung kaya’t ang “jungle survival” na bahagi ng pinagsanib na pagsasanay militar na ginanap sa Sierra Madre sa Fort Magsaysay, Nueva Ecija ay hindi para sa kamping ala Boy Scouts kundi pagsasanay sa paglulunsad ng digmang agresyon ng US sa iba pang katulad na tropikal na kalupaan. Paghahanda rin ito ng US sa malamang na tuwirang panghihimasok sa Pilipinas sa harap ng patuloy na paglakas ng rebolusyonaryong kilusan. Para sa Rehimeng Estrada, ang pagpasok ng mga abanteng gamit militar “para sa seguridad” ay hindi para sa mahihirap, kundi laban sa nag-aalsang mamamayan na nais makaahon sa kahirapan.

Habang umiiral ang imperyalismo, at tinatangkilik ng mga papet na rehimen katulad ng Rehimeng Estrada, patuloy na isasalaksak sa atin ang mga neokolonyal na kasunduan tulad ng VFA. Sa ilalim ng ganitong sistema, hindi kailanman makakairal ang relasyong magkapantay at magkaibigan. Magpapatuloy ang pang-aapi at pagsasamantala sa malawak na masa ng

Habang umiiral ang imperyalismo, at tinatangkilik ng mga papet na rehimen tulad ng Rehimeng Estrada, patuloy na isasalaksak sa atin ang mga neokolonyal na kasunduan tulad ng VFA. Sa ilalim ng ganitong sistema, hindi kailanman iiral ang relasyong pantay at magkaibigan.

mamamayang Pilipino.

Ibayong lumalakas ang kahilingan ng mamamayan para sa pambansang pagpapalaya. Ipinapakita ito ng masigabong pagtutol sa VFA, sa mga patakaran sa ekonomyang sakmal ng dayuhang monopolyo, at higit sa lahat, sa pagsulong ng armadong rebolusyon para pabagsakin ang panlipunang sistemang pinaghaharian ng imperyalismo, burukrata kapitalismo at pyudalismo. Lumalawak ang bilang ng mamamayang namumulat na ang demokratikong rebolusyong bayan sa pamamagitan ng matagalang digmang bayan ang puspusang papawi sa malakolonyal na kaayusan ng lipunang Pilipino.●



Grapik mula sa Ulos

VFA: Lisensya para sa Interbensyon at Agresyon ng Imperyalismong US



Hindi tumitigil sa pagpapakulo, kapwa ng pansindak at pang-akit ang mga galamay at lokal na utusan ng

Imperyalistang Estados Unidos para lamang maaprubang ang Visiting Forces Agreement.

Panakot: nariyang madidisapoynt daw ang EU, ayon sa embahador nitong si Thomas Hubbard. Nariyang kailangan daw natin ang proteksyon laban sa mga terorista, ayon kay Defense Secretary Orlando Mercado. At nitong huli, nariyang kailangan ang tropang Amerikano para harapin ang banta ng kapangyarihang nukleyar ng Tsina na nananakop sa Spratlys Islands.

Pang-akit: ang pinirmahan ni Hubbard at Foreign Secretary Domingo Siazon na VFA 2, isang kasunduan na bilang ganti ay libre ring pumasok ang mga tropang Pilipino at mga pamilya nila kapag nagdaos ng mga pagsasanay militar sa Amerika.

Tulad ng inaasahan, ang pinakatuta at nangangayupapang pahayag ay mula sa pangulo ng Pilipinas, si Estrada: “Kailangan natin ito para sa seguridad ng bansa...dahil ang militar natin ang pinakamahirang sandatahang pwersa sa Timog Silangang Asya.” Siya nga rin pala ang nagsabing “baka lalo tayong magkahirap-hirap” kapag di naaprubang ang VFA.

Ang VFA 1 ay isang panukalang kasunduan para sa pagpasok sa Pilipinas ng mga Amerikano, sandatahang pwersa man o sibilyang kasama ng mga tropa nito. Sa ilalim nito, tungkulin ng gobyerno ng Pilipinas na tanggapin ang mga papasok na pwersang Amerikano, na: hindi na gagamit ng visa at pasaporte, hindi na kukuha ng lisensya para makapagmaneho ng sasakyan sa Pilipinas, at hindi na kailangang magparehistro o magbuwis para sa mga papasok nilang sasakyan

o anupang kagamitan o armas.

Binibigyan din ng VFA ng karapatang ekstra-teritoryal ang mga tropang US kaya labas sila sa hurisdiksyon ng gobyernong Pilipino kahit pa nakalabag ang mga ito sa batas ng Pilipinas.

Ang paggigiit ng EU na makapaglabas-masok ang tropa nito sa Pilipinas, at ang pangangalandakan ng Rehimeng Estrada ng pagsandig nito sa Amerika ay hindi matatawag na diplomatikong relasyon kundi relasyon ng Imperyalistang kapangyarihan at neokolonya nito.

Sa ganitong tono iginigiit ng mga pumirma sa VFA 1 at 2 na sila'y tapat lamang sa Mutual Defense Treaty ng 1951 at Military Assistance Pact ng 1947 – kapwa mga neokolonyang kasunduan na nagtitiyak ng pagsandig ng Pilipinas sa Amerika para sa lakas militar, at ng sakmal ng Imperyalistang US sa pamamagitan ng presensya nila sa Pilipinas.

Ang presensyang militar ay kailangan ng Imperyalistang US upang mapangalagaan ang seguridad – hindi ng Pilipinas – kundi ng interes ng Amerika rito at sa Asya. Ang US ang pangunahing superpower na may pinakamalaking pang-ekonomiya, pampulitika at pangmilitar sa interes sa bansa at sa buong Asya.

Angkop na angkop naman sa pangangailangan ng Rehimeng Estrada ang VFA para sa pagpasok ng suportang militar upang punuan ang “hindi natuloy” na P331 bilyong modernisasyon ng Armed Forces of the Philippines. Sa bawat pagpasok ng mga tropang Amerikano ay kasabay na pumapasok ang mga sandata, amunisyon, kagamitan at suplay sa sandatahang pwersa ng Pilipinas.

At hindi man magtayo ng base militar tulad ng dating 66,400 ektaryang kubakob ng kanilang kapangyarihan sa Subic at Clark sa Gitnang